

ROZÁRIU – ANUNSIASAUN NA'I NIAN

INTRODUSAUN: Iha loron ita hanoin Anunsiasaun Na'i nian, mai ita aprende husi feto-raan Nazare ne'e oinsá hatene **rona**, **dixerne** no **moris** Maromak nia bolun.

LEITURA EVANJELLU – Lc 1, 26-38

MOMENTU 1 – BOLUN-ELEISAUN HUSI MAROMAK NIA PARTE

"Maromak haruka anju Gabriel ba knua ida Galileia nian, naran Nazaré, ba feto-raan ida naran Maria".

L 1 - Trasu karakterístiku dahuluk mak ida-ne'e. Maromak mak protagonista iha narrasaun ne'e. Istória vokasaun Maria nian, nune'e mós istória hotu vokasaun nian, mak presente no mistériu.

Maromak mak haruka Gabriel, Maromak mak hakonu ho grasa... Nune'e atan-feto ne'e, mamuk husi an rasik, sai nakonu ho grasa, no iha nia Maromak halo buat kmanek oioin.

Ne'e lisaun ida mai ita hotu. Hodi de'it grasa nia roman, hodi husik ba Maromak fatin aas iha ita-nia moris mak ita bele komprende an rasik no deskobre ita-nia vokasaun nia istória.

L 2 – Reflete:

* Ha'u fó fatin absolutu no uluk liu ba Maromak no ninia grasa?

* Ha'u interpreta kompromisu no devér sira ha'u-nia estadu moris nian nu'udar resposta ba domin ida ne'ebé mai molok ha'u no garante ha'u-nia resposta?

* Ha'u hatene simu Maromak nia imprevistu (surpreza) sira, ninia maneira atu intervein iha ha'u-nia moris no istória? Ha'u hatene rekoñese Nia iha modalidade ninia manifestasaun nian, hodi la impoin ha'u-nia modu sira?

Hananu Ave Maria

MOMENTU 2 - MARIA NIA RESPOSTA

"Ne'e sá, Na'i nia atan oan mak ne'e. Halo tuir ita liafuan bá!"

L 1 - Iha intervensaun gratuita Maromak nian, Maria taka ninia dixernimentu ho liafuan ida disponibilidade nian. Nia koñese Maromak no rekoñese nia an rasik, atan haraik-an iha ne'ebé grasa hala'o buat boboot iha nia.

Trasu daruak istória vokasaun bíblika nian: resposta husi ida-ne'ebé simu bolun.

Ne'e mak resposta ida ne'ebé iha Maria totalmente positiva: mamuk husi an rasik, feto-raan ne'e nakonu ho grasa. Maibé resposta bele mós negativa: hanoin fali foin-sa'e riku. Nia lakohi hamamuk nia an husi soin sira, nia la husik espasu ba grasa, no bá ho oin-kraik.

L 2 – Atu reflete:

* Sá mak iha ha'u-nia moris ha'u sei presiza husik atu tuir Jezús?

* Sá loos mak sikun nakukun ha'u-nia moris nian, iha ne'ebé resposta ba bolun kuran iha laran-luak?

Reza Ave Maria espontânea

MOMENTU 3 - MISAUN

"Ó hetan rahun di'ak tebes iha Maromak futar oin. Ó sei ko'us no tuur-ahi oan mane ida. Ó sei hanaran Nia Jezús".

L 1 - Ne'e mak trasu datoluk istória vokasaun bíblika nian: misaun. Maria simu bolun atu sai inan, inan ba Oan ne'e, no iha Nia inan ba ema hotu. Maibé ida-ne'e misaun ida ne'ebé nia deskobre ho modu graduál, to'o komprende ninia sentidu tomak iha Jezús nia krús ain.

Iha ne'e ita simu hanorin importante ida ba ita-nia moris: ita mós sei haluan ita-nia espasu misaun nian no sei deskobre ninia aspetu fekundu liu, se ita disponivel – hanesan Maria – atu halo peregrinasaun ida fiar nian ne'ebé mós dalan krús nian. Hodi nakloke atu hakohak loroloron krús no tuir Jezús, mak ita deskobre misaun ne'ebé entrega mai ita, ninia profundidade.

L 2 – Atu reflete:

* Loroloron, ita iha possibilidade atu hatán hanesan Maria ka hanesan foin-sa'e riku. No ha'u, saida mak hau sei presiza husik atu tuir Jezús?

Reza Ave Maria ho lian oioin

MOMENTU 4 - MARIA NIA KONFUZAUN

"Rona tiha lia ne'e, nia laran taridu hodi husu ba nia an rasik lia anju hato'o ne'e katak sá loos... " Ne'e sei sai oinsá loos?"

L 1 - Karakterístika dahaat istória vokasaun nian: rezisténsia, laran-taridu, tentasaun sira. Baibain tiha ona atu haree iha istória vokasaun bíblika faktu sira dúvida nian no interrogasaun sira. Ne'e katak dúvida la'ós sala ida tanba hakarak desvia, maibé etapa ida nesesária ba dixernimentu.

Maromak interpela liberdade ida, no liberdade responsavel ida. Maski nune'e, dúvida labele sai ita-nia liafuan ikus: dúvida permanente ikusmai sei tesi kotu liras sira fiar nian no paraliza possibilidade atu fó resposta laran-luak nian ba Na'i.

L 2 – Atu reflete:

* Iha ha'u-nia moris, akontese katak dúvida halo ha'u husu Maromak nia naroman no ema seluk nia tulun ka taka an?

Reza Ave Maria ba foin-sa'e sira ne'ebé duvida kona-ba sira-nia vokasaun.

MOMENTU 5 – MAROMAK NIA KONFIRMASAUN

"Keta tauk Maria".

L 1 - Istória nia hahalok ikus: Maromak nia konfirmasaun ne'ebé fó serteza.

Baibain, konfirmasaun iha istória vokasaun nian ema la koko molok, hanesan garantia, enkuantu ita hein hodi la halo buat uda ka liman dobra hela. Maromak nia konfirmasaun bele koko de'it hodi halo dalan moris saran-an nian ba Jezús no ba ema seluk. Nune'e, iha ita-nia moris sei la kuran sinál sira Maromak nian, no hateke fali ba kotuk, ikusmai, ita sei deskobre katak buat hotu mak grasa.

L2 – Atu reflete

* Ha'u sente Maromak nia kbiit ne'ebé harohan iha ha'u, ninia vitória hasoru laran-taridu no tauk? Ha'u sente Nia mak ha'u-nia kbiit no vitória?

* Ha'u hatene deside ba Maromak laho reserva, hodi rekoñese sinál sira nia tulun nian iha ha'u-nia misaun?

* No ha'u-nia orasaun lori ba desizaun ida halo ho aten-barani, hanesan Maria nia fiat?

Ave Maria nia parte dahuluk Gia mak reza, koru hatán ho Santa Maria hanesan baibain.

1. Ave Maria, "Rahun di'ak, feto kmanek wa'in tebes Na'i ho ó".
2. Ave Maria, " Ave Maria, "Keta tauk; basá ó hetan rahun di'ak tebes iha Maromak futar oin".
6. Ave Maria, "Espíritu Santu sei tun ba ó no Na'i aas liu hotu nia kbiit sei hamahan ó".
7. Ave Maria, "Ó sei ko'us no tur ahi oan mane ida; Ó sei hanaran Nia Jezús".
8. Ave Maria, "Oan ne'e sei sai ema boot."
9. Ave Maria, "Oan ne'e sei hanaran An Na'i aas liu hotu nia Oan".
10. Ave Maria, "Nia sei ukun Jacob nia uma-kain ba nafatin; nia ukun sei rohan laek".

Orasaun final: Na'i, Ita-Boot hakarak atu Ita Oan simu isin ida nu'udar ema iha Virjen Maria nia knotak momoos. Haraik tulun mai ami ne'ebé celebra ami-nia Maksoi, nu'udar Maromak loos no Mane loos, atu ami mós bele hola parte iha Nia moris rohan-laek.

Knananuk: Maria de Nazaré